

Is Surat Ni Epustul Pablo Ziyà Te Ki Pilimun

Is Mehitenged te Surat he Para ki Pilimun

Duen hangyù ni Pablo ziyà te emigu zin he si Pilimun he tigKulusas. Hein nepirisu si Pablo ziyà te Ruma nekilala zin is etew he egngезanan ki Unisimu. Si Unisimu, uripen ni Pilimun su zutun he timpu, utew medmezakel is minge etew he uripen. Ne si Unisimu, mibepeguyan din si Pilimun ne ziyà sikandin mekeaput te ki Pablo. Ne wazà meuged neketuu si Unisimu te Meupiya he Tudtulanen he impenurù ni Pablo ne nehimu sikandin he ugup ni Pablo zutun te kedlised din diyà te pirisuwan.

Dutun te kegkehimuwa ki Unisimu he sakup ni Jesus, neisip ni Pablo he meupiya ke ed-husayen din si Unisimu wey si Pilimun su pudu zan en tumutuu ki Jesus. Iyan, egkahandek si Unisimu su zutun he timpu kenà supak te velaud te gubirnu emun edhimetayan te etew is ebpelaguy he uripen din wey ke ebpurungan din ebugela. Ne mibpesuratan ni Pablo si Pilimun te kedhangyù diyà te kandin he peseyluwa zin si Unisimu wey zewata zin daan.

Ne midtuu si Pablo he siguradu ed-uyun si Pilimun dutun te hangyù din su netuenan din he metazeng si Pilimun wey mahal ziyà te gehinawa zin si Jesus he Nengazen.

^{1,2}Minahal he emigu zey wey timbang dey he si Pilimun. Siak si Pablo is nepirisu tenged te kedtuu ku ki Jesu Kristu wey si Timoteo he suled tew, ebpesuratan dey sikew, wey si Epiya he etevew tew tenged te kedtuu, wey si Erkipu he zuma tew he sundaru ni Kristu wey elin daan ebpesuratan dey is minge tumutuu he ziyan edsimba te valey nu.

³Berakat he ikegagew kew te Amey tew he Megbevayà wey te Nengazen tew he si Jesu Kristu wey vegayi kew zan te melinawen he kebpekesavuk.

Is Kedtuu wey Gagew ni Pilimum

⁴Sikew, suled, layun dekelà is kebpelelemati ku te Megbevayà tenged kenikew te kada ku ked-ampù; ⁵su nezing ku is tudtul mehitenged te mezesen he kedtuu nu te Nengazen tew he si Jesus wey mehitenged te kebmalaha nu ziyà te gehinawa nu te langun he minge tumutuu kandin. ⁶Ne id-ampù ku zaan he pinaagi te kebpekid-upakat nu kenami tenged te kedtuu tew, med-iseg is kedsavut tew te langun he meupiya he intuvad kenitew te Megbevayà tenged te nekidsevaha kiw ki Kristu. ⁷Uteu ingkeliye, Geli, is kebmalaha nu te minge zuma tew he tumutuu. Ingkeheget heini te kedtuu ku su pinaagi kenikew nengeliye is gehinawa te minge etew ziyàn he gaked te Megbevayà.

Is Hangyù ni Pablo Mehitenged ki Unisimu

⁸Ne tenged kayi te langun duen idhangyù ku kenikew. Netuenan ku he tenged te kegehèm he imbegey kedì ni Kristu egkehimu he edsugù a kenikew he himuwa nu is hustu, ⁹iyàn, tenged te utew ka mahal zini te gehinawa ku, edhangyù e zà kenikew. Siak, si Pablo, is megurang wey guntaan pinirisu a zaan tenged te kedtuu ku ki Kristu, ¹⁰edhengyuan ku sikew he peselyuwa nu si Unisimu. Tenged te kedtuu zin ki Kristu iring sikandin te tutuu en he anak ku su pinaagi kedì nehimu sikandin he tumutuu zini te pirusuwan. ¹¹Dengan wazè nu pulus ki Unisimu, iyan, guntaan edekelà utew is pulus tew kandin.

¹²Ibpeulì ku en diyan te kenikew si Unisimu he utew ku pezem minahal. ¹³Neisip ku he meupiya pezem ke iyan sikandin duma ku kayi su wey mehimu sikandin he iyan tavang nu kedì te kemulu e pa nepirisu zini tenged te kedsengyawa ku te Meupiya he Tudtulanen. ¹⁴Iyan, kenè ku pa heini ebeelan te wazè nu pa itugut kediey. Kenà a ebpeges he ikehizu a kenikew. Su iyan meupiya is ebpuun te meliwanag he gehinawa is kedhimuwa nu kayi. ¹⁵Kela ke iyan tuyù te Megbevayà te kedsuwaya ni Unisimu kenikew is: impaawà sikandin diyan te kenikew te wazè utew meugèt su wey mehimu he megaked nu en te wazè pidtemanàn. ¹⁶Ne guntaan kenà sikandin uripen nu zà duen, kekenà, utew pa mahal kenà is uripen su suled nu en daan tenged te kedtuu zin ki Kristu. Uteu sikandin mahal zini te gehinawa ku ne mahal pa zaan diyan te kenikew, kenà tenged dà te uripen nu, kekenà, tenged daan te suled nu en tenged te Nengazen.

¹⁷Ne emun ed-isipen a kenikew he timbang nu, igalewgalew nu si Unisimu iring te kegelgelawa nu kediey. ¹⁸Ke zuen salè din diyan te kenikew wey ke zuen utang din diyà te kenikew, isipa nu he kediey. ¹⁹Ahaa nu is kedsurata ku kayi: Iyan a si Pablo ebayad. Asal netuenan nu he zekelà daan is utang nu kedì su pinaagi kediey nekeangken ka te

untung he wazè din pidteman. ²⁰Ne tenged kayi, Geli, edhengyuan ku sikew he ikehizu a kenikew su telesuled ki pinaagi te kedtuu ta te Nengazen. Himuwa nu heini wey a melipey su telesuled ki pinaagi ki Kristu.

²¹Dekelà is kedsarig ku kayi te kebpesurati ku kenikew su netuenan ku he ebpeminegen a kenikew. Netuenan ku he zekelà is edhimuwen nu, kenà te idhangyù ku.

²²Ne zuen pa idhangyù ku he iyan is: endami a zaan te edhizegaan ku ziyàn, su zekelà is kedsarig ku he pinaagi te ked-ampù niw, idtugut te Megbevayà he mekehendiyàn a te keniyu.

²³Si Ipapas, is duma ku he pinirisu tenged te kedtuu ki Jesu Kristu, ebpengemusta keniyu. ²⁴Ebpengemusta zaan keniyu ensi Marcos, si Eristarku, si Dimas, wey si Lucas. Menge timbang ku sikandan kayi te ebpevelan te Megbevayà.

²⁵Berakat he ikegagew kew is langun te Nengazen tew he si Jesu Kristu.